

Teško oboljeli traže da se legalizira kanabis u medicinske svrhe



Predstavnici nekoliko udruženja teško oboljelih građana BiH danas su, na pres-konferenciji koju je organizirao poslanik u Predstavničkom domu Parlamentarne skupštine BiH Saša Magazinović, pozvali nadležne institucije da poduzmu odgovarajuće aktivnosti na legalizaciji kanabisa u medicinske svrhe.



Magazinović je kazao da je procjena da se u ovom trenutku više od 10 hiljada građana Bosne i Hercegovine

liječi koristeći kanabis, naglasivši da treba razdvojiti konzumiranje kanabisa u bilo koje druge svrhe osim u medicinske.

Navodi da država ništa ne radi kako bi se riješilo ovo pitanje. Napomenuo je da je preporuka Svjetske zdravstvene organizacije, jednako kao i u drugim državama, da se omogući korištenje kanabisa u medicinske svrhe.

– Ovo nije priča o tome kada ćemo imati tu mogućnost, jer ćemo je imati, ali je priča o životu i smrti ljudi koji su trenutno oboljeli. Oboljeli građani u BiH su od države napravljeni kriminalcima, krijumčarima, ljudima koji krše zakone iz razloga što ulje kanabisa nabavljaju u zemljama okruženja gdje je to sasvim legalno, boreći se za svoje živote, svjesni da im to njihova država nije omogućila – istaknuo je Magazinović.

Dodao je da država, osim što teško oboljele pravi kriminalcima, pomaže crno tržište. Napomenuo je da se na crnom tržištu u BiH neki od lijekova i preparata mogu nabaviti, u pravilu su tri do pet pa i više puta skuplji nego što su u legalnoj prodaji u zemljama okruženja.

Magazinović je postavio pitanje „da li neko u vlasti i ko je dio organizovane kriminalne grupe koja ne dozvoljava da se postupi po preporuci Svjetske zdravstvene organizacije i omogući liječenje građana kao u zemljama regije, da bi se na crnom tržištu ostvarivao ekstra profit i zarađivalo na mucu ovih ljudi“.

– Čak i da ovo nije tačno, a imam pravo da sumnjam da jeste, kao što krivično djelo može biti napravljeno činjenjem, tako postoji i krivično djelo da niste spriječili da se nešto loše desi. U najmanju ruku, institucije prave tu vrstu krivičnog djela. Da li treba da počnemo govoriti imena političara koji koriste ulje kanabisa da se liječe, da li treba da govorimo o imenima policajaca, inspektora, vjerskih službenika, javnih ličnosti, poznatih doktora, pa da ih dovedemo u nezgodnu situaciju da se pokrenu, da to omoguće i svima ostalima, ali na legalan način – naglasio je Magazinović.

Predsjednica Farmaceutске komore Federacije BiH Zahida Binakaj je kazala da su prije dvije i po godine shvatili da veliki broj pacijenata dolazi i pita da li će BiH pokrenuti inicijativu legalizacije kanabisa u medicinske svrhe, te da su tada zvanično pokrenuli inicijativu legalizacije kanabisa na nivou države BiH.

Pojasnila je da taj postupak legalizacije ima dva koraka – u prvom koraku je ministar civilnih poslova BiH pozvao više od 50 stručnjaka iz različitih oblasti, koji su pravili procjenu da li uopće za građane BiH treba omogućiti kanabis kao sredstvo koje bi ublažilo ili izliječilo pojedina patološka stanja.

Po njenim riječima, zajednička odluka svih tih stručnjaka je bila da građanima BiH legalno treba omogućiti kanabis preko zdravstvenog sistema, preko kontrole državnih institucija, jer se radi o narkotičkom sredstvu.

Dodala je da je uslijedio i drugi korak, koji se najviše tiče Ministarstva sigurnosti BiH, jer na nivou države BiH postoji Zakon o prometu narkotičkim sredstvima, onih koji su zabranjeni i onih koji su dozvoljeni.

– Kanabis se nije našao još uvijek na listi dozvoljenih, u strogo kontrolisane medicinske svrhe. Shvatili smo da je izmjena zakona relativno spora stvar, pa smo ponudili rješenje koje bi bilo 'bajpas', da ministar civilnih poslova, dok se ne izvrši izmjena zakona, odlukom dozvoli korištenje kanabisa u strogo kontrolisane medicinske svrhe – kazala je Binakaj, napomenuvši da ta odluke još uvijek nije prihvaćena.

Kazala je da su pripremili i izmjene zakona koji definira promet narkotičkim sredstvima, „tako da praktično ljudi koji odlučuju u Vijeću ministara i parlamentu imaju kompletno pripremljene procedure koje su usaglašene s evropskim direktivama, sa susjednim zemljama koje već imaju pozitivna iskustva sa korištenjem kanabisa za različita patološka stanja“.

– Mislim da nema još uvijek dovoljno svijesti i savjesti da se prihvati ta odluka i da se brzim koracima krene u izmjenu zakona koji regulira promet narkotičkim sredstvima na teritoriji BiH – navela je Binakaj.

Glumac Irfan Ribić je iznio svoje iskustvo u liječenju uljem kanabisa, napominjući da je 2015. dobio dijagnozu multitipe skleroza. Podsjetio je da je 2018. godine posegnu za uljem kanabisa, nakon čega nikada više nije imao ni jedna problem, nije 'pao u kolica', kao što su mu to doktori prognozirali.

– Ako neko ima situaciju da mu je moguće pomoći uljem kanabisa, hajmo mu to omogućiti – poručio je Ribić.

Omer Isović iz Udruženja „Zmajevno srce“ iz Tuzle je kazao da se već na narednoj sjednici Vijeća ministara BiH, ukoliko postoji volja, ovo može završiti „i da otvorimo proces“.

– Nemojte misliti da će se ljudi početi liječiti kanabisom već prekosutra, za to treba vremena. Ali što prije to bolje, da bi naši doktori prošli određene obuke i da bismo to za šest-sedam mjeseci imali u apotekama, da možemo na preporuku doktora to da uzmemo – kazao je Isović.

Po njegovim riječima, kad Svjetska zdravstvena organizacija nešto preporuča, kao što je legalizacija kanabisa, to ima svoju težinu, a Bosni i Hercegovini to predstavlja i jednu vrstu obaveze.

Predsjednik Udruženja oboljelih od multiple skleroze Tuzlanskog kantona Mersudin Muminović je istaknuo da ulje kanabisa pomaže oboljelima, te da je na crnom tržištu jako skupo i mnogi nemaju mogućnost da ga kupe ili moraju prodavati vrijedne stvari koje imaju da bi nabavili taj lijek.

– To nije rješenje, rješenje treba naći država, da nam izađe u susret. Nije rješenje da idemo na crno tržište i da punimo novčanike nekim dilerima – smatra Muminović.

Predsjednica udruženja koje se bori protiv karcinoma „Nijemi krik“ iz Kalesije Hajra Bajrić-Jahić je oboljela od raka koji je metastazirao.

– Nakon 17 operacija, 36 kemoterapija i 30 zračenja, borila sam se nekoliko godina dok nisam shvatila da postoje i druge metode, a to je ono o čemu danas pričamo. Ja sam pobijedila rak – kazala je Bajrić-Jahić.

Pozvala je nadležne da legaliziraju kanabisovo ulje kao lijek.

– Pozivam sve one koji mogu svojim potpisom spasiti desetine hiljada ljudi da stanu na svoje noge, da ustanu, da prohodaju, da ozdrave, neka stave taj potpis, neka legalizuju kanabisovo ulje – poručila je ona.(Fena, tl)

Date: 09-09-2019